

Nunatsinni innarluutilinnut amigartumik naammaginangitsumillu neqerooruteqartarneq pequtigalugu Danmarkimi innarluutillit ullumikkut siunissamilu inissinneqartartut/tussat pillugit Nunatsinni innarluutilinnut sullissivimmik pilersitsisoqassappat periarfissat unammillernartullu pillugit Naalakkersuisut kingusinnerpaamik 2017-ip naannginnerani saqqummiunneqartussamik nalunaarusioqullugit peqquneqarnissaannik Inatsisartut aalajangiiffigisassaattut siunnersuut.

Nassuiaat Inatsisartuni kingusinnerpaamik 2017-ip naajartornerani saqqummiunneqassaaq.
(Siumup Inatsisartuni gruppia)

Akissuteqaat

(Isumaginninnermut, Ilaqutariinnut, Naligiissitaanermut Inatsisinillu Atuutsitsinnermut Naalakkersuisoq)

Siullermeerneqarnera

Siumup Inatsisartuni gruppiata inunnut innarluutilinnut suliassaqarfimmut taamatut siunnersuuteqarlutik saqqummiussaqaarnerat qujassuteqarfigissavara.

Qanoq iliorluta inunnut innarluutilinnut tapersersuilluarsinnaanerunitta qulakkeersinnaanera isummorsorfigisariaqaratsigu Naalakkersuisut isumaqataaffigaat. Taamatut anguniagaqartoqarneranut ilaatillugu maanna Inatsisartut ataatsimiinneranni Inuit Innarluutillit Illersuisuat pillugu Inatsisartut inatsisissaattut siunnersuummik Naalakkersuisut saqqummiussaqaarput. Ukiarpat Sisimiuni Nuna Tamakkerlugu Inunnut Innarluutilinnut Sullissivik nutaaq ammarneqassaaq aamma Inunnut innarluutilinnut pisinnaatitaaffiit pillugit Naalagaaffiit Peqatigiit Isumaqatigiissutaat aallaavigalugu inunnut innarluutilinnut ikiorsiisarneq pillugu inatsimmik aaqquissuusseqqinnermik UKA 2017-imi Naalakkersuisut saqqummiissamaarput.

Innuttaasunut innarluutilinnut pisinnaatitaaffinnik paasisaqaarnerulernermi kalaallit innuttaasut innarluutillit Danmarkimi inissinneqartut aamma isiginiarneqarput. Inunnut Innarluutilinnut taakkununga inissiinerup nalaani Kalaallit Nunaanni inissiiffissaqarsimanginnera Danmarkimut inissiisoqarneranut pissutaapput. Innuttaasunut annertuumik innarluutilinnut massakut atugassaasut neqeroorutaasinnaasullu pitsanngorsaaffigisariaqarmata, innuttaasullu annertuumik innarluutillit misissuiffigineqarnerusariaqarmata siunnersuuteqartumut Naalakkersuisut isumaqataapput.

Inuit annertuumik innarluutillit inuttut atukkamikkut assigiinngitsorujussuummata ukiuni arlaqaqisuni inissinneqarlutik Danmarkimiissimasut sunik neqeroorfigineqassanersut pisariaqartitsinersullu misissuiffigeqqissaarneqartariaqarmata siunnersuuteqartumut Naalakkersuisut isumaqataapput. Misissueqqissaarnermi pisariaqartitat qulaajarneqassapput, misissueqqissaarnerullu tunngavilissavaa Kalaallit Nunaanni sunik neqerooruteqartoqartariaqarnerisq pineqartut ikiorserneqarnissamik pisariaqartitsinerat naammassineqassappat.

Inuit annertuumik innarluutillit qanoq innarluuteqarnerannut, pisinnaasaasa killeqartut suunerinut aamma sulisunut ilisimasalinnut suliatiqullu neqeroorfigisinnaanerannut tunngatillugu assigiinngi-tsorujussuunerat maluginiassallugu pingaaruteqarpoq.

Innuttaasut ataasiakkaat ikiorserneqarnissamik qanoq pisariaqartitsitiginerat aallaavigalugu inuillu ataasiakkaat immikkut naliliiffiginerisigut inunnut annertuumik innarluutilinnut ikiorsiissutit inatsisit naapertorlugit tunniunneqartussaapput. Tamanna innuttaasunut annertuumik innarluutilinnut tamanut atuuppoq. Danmarkimi inissiisarneq pisarsimavoq inuit ataasiakkaat ikiorserneqarnissamik pisariaqartitsinerannik nalilersuinerit tunngavigalugit.

Inuit innarluutillit inuit pisinnaatitaaffii pillugit isumaqatigiissutaasunut aamma ilaammata, taamaalillutillu Kalaallit Nunaannut utertitsisoqarniarneranik aalajangiisoqartussaatiillugu akuersiteqqaarneqartussaammata maluginiassallugu pingaaruteqarpoq.

Ilanngullugu oqaatigissallugu pingaaruteqarpoq inuit innarluutillit inuttut innarluuteqartutut atugaat assigiinngiiaangaarmata sullissivimmi ataatsimi najugaqatigiilernissaat takorlooruminaammat. Inunnut Innarluutilinnut Sullissivik maanna Sisimiuni sannaartorneqarpoq sullissivillu aqutugalugu ilisimasanik annertusaanissaq siunertaavoq.

Innuttaasut taakku pillugit paasissutissiinissaq misissuinissallu siunissami inissiinissat pinaveer-saartinnissaannut atortutut aamma atorneqarsinnaalluarput.

Taamatut oqaaseqarlunga Naalakkersuisut sinnerlugit innersuussutigissavara siunnersuut itigartinneqassasoq, allannguutissatullu siunnersuut tullinnguuttoq akuerineqassasoq innersuussutigissallugu.

“Kalaallit innarluutillit Danmarkimi ullumikkut siunissamilu inissineqartartut/tussat pillugit Nunatsinni inuit innarluutillit najugaqarfiinik allatigullu inuuniarnermikkut ikiorserneqarnissaannut pilersitsisoqassappat periarfissat unammillernartullu pillugit Naalakkersuisut saqqummiunneqartussamik nalunaarusioqqullugit peqquneqarnissanik Inatsisartut aalajangiiffigisassaattut siunnersuut. Nassuiaat Inatsisartuni kingusinnerpaamik 2017-ip naajartornerani saqqummiunneqassaaq.”